



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.46/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët, Hidajete Gashi Alaj kryesuese, Kujtim Pasuli dhe Ramush Bardiqi anëtarë, duke vendosur përkitazi me ankesën e “Rrjeti i Organizatave Joqeveritare “AVONET“, me seli në Ferizaj, e parashtruar kundër Iniciativës Qytetare “NE MUNDEMI, me seli në Ferizaj (kandidatit Naim Gashi), për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë fushatës zgjedhore, për Zgjedhjet Lokale që do mbahen në Republikën e Kosovës më datë 12.10.2025, në seancën e panelit të mbajtur, më datë 20.09.2025, merr këtë:

V E N D I M

HEDHET E PASAFATSHME ankesa e “Rrjeti i Organizatave Joqeveritare “AVONET“, me seli në Ferizaj, ZL.Anr.46/2025, e parashtruar kundër Iniciativës Qytetare “NE MUNDEMI“, me seli në Ferizaj (kandidatit Naim Gashi), për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, gjatë Fushatës Zgjedhore për Zgjedhjet Lokale që do të mbahen me datë 12 Tetor 2025.

A r s y e t i m

Me datë 19.09.2025 PZAP-i, ka pranuar një ankesë nga “Rrjeti i Organizatave Joqeveritare “AVONET“, me seli në Ferizaj, e dërguar përmes postës me datë 16.09.2025, duke u mbështetur në normën e nenit 39 të Ligjit për Zgjedhjet e Përgjithshme, në të cilën theksohet se, zyrtari publik Naim Gashi i cili aktualisht mban pozitën e Udhëheqësit të Zyrës së Punësimit në Ferizaj, pranë Agjencisë së Punësimit në Republikën e Kosovës, i njëjti më veprimet e tij ka shkelur normën e nenit 36, paragrafit 2 të LZP. Zyrtari publik, Naim Gashi, i cili në Zgjedhjet Lokale të 12 Tetorit, garon si kandidatë për anëtarë të Kuvendit të Komunës së Ferizajt në kuadër të Iniciativës Qytetare “NE MUNDEMI“, në profilin e tij në rrjetin social Facebook më datë 14 Shtator 2025 ka publikuar një fotografi e cila ka përmbajtur promovuese zgjedhore dhe e njëjta shërben si thirrje për të votuar atë dhe Iniciativën Qytetare në fjalë.

Me tutje në ankesë ka theksuar se, parashtruesi i ankesës ka bashkangjitur u prova materiale si: fotografi e Naim Gashit Zyrtarit Publik që aktualisht mban pozitën e Udhëheqësit të Zyrës së Punësimit në Ferizaj dhe njëkohësisht kandidat për anëtarë të Kuvendit Komunal në Ferizaj në kuadër të Iniciativës Qytetare “NE MUNDEMI” e realizuar në ambientet publike të Zyrës së Punësimit në Ferizaj e që kjo përbën veprim të ndaluar sipas normës së nenit 36 , paragrafit 2 të ligjit pozitiv për zgjedhjet e përgjithshme .

Në përgjigjen në ankesë, nga Naim Gashi, kandidat për anëtar të Kuvendit Komunal në Ferizaj (Iniciativa Qytetare NE MUNDEMI), është theksuar se, kandidati ka pezulluar të gjitha aktivitetet e punës gjatë fushatës dhe nuk kryen detyra zyrtare në këtë periudhë (pushim i formalizuar nga punëdhënësi). Tutje ka shtuar se fotot e cituara nga ankuesi janë shkarkuar nga rrjeti social Facebook dhe përfshijnë portrete të realizuara më herët në ambientin e zyrës (para fushatës). Lidhja e fotove tjera para fushatës nuk ka asnjë kuptim. Tutje kanë theksuar se fotot e përmendura janë materiale arkivore të realizuara para fushatës, dhe se lidhja me fotot tjera për të krijuar përshtypjen e përdorimit të zyrës është spekulative, ankesa nuk paraqet asnjë prove direkte për kohën dhe vendin e realizimit, mungojnë data, dëshmitarët ose çfarëdo dëshmie për përdorim aktiv të hapësirave publike dhe se elementet e përgjithshme të sfondit si tavolinë, murë, raftë nuk mjaftojnë për të dëshmuar një aktivitet zgjedhor në institucion, publikimi i një fotografie arkivore pa veprimtari zgjedhore brenda institucionit nuk përbën përdorim të pasurisë publike sipas ligjit, duke i propozuar PZAP-së të refuzojë si të pabazuar.

Paneli, pasi që shqyrtoj të gjitha shkresat e lëndës, konstatoi se:

-Ankesa është e pasafatshme.

Paneli, pas shqyrtimit të ankesës ka gjetur se ankesa e parashtruar nga “Rrjeti i Organizatave Joqeveritare “AVONET”, me seli në Ferizaj kundër Iniciativës Qytetare “NE MUNDEMI”, (kandidatit Naim Gashi, është parashtruar pas afatit ligjor të përcaktuar me dispozitën ligjore të nenit 39 paragrafi 3 i LZP-së, në të cilin nen në mënyrë decisive thuhet se: “Personi i cili ka interes ligjor në një çështje brenda juridiksionit të PZAP-it, ose të drejtat e të cilit janë shkelur për sa i përket shkeljeve të pretenduara të Kodit të Mirësjelljes për subjektet politike, mbështetësit e tyre dhe kandidatët gjatë periudhës së fushatës zgjedhore dhe ditës së zgjedhjeve, mund të paraqes ankesë në PZAP brenda dyzet e tetë (48) orëve nga ndodhja e shkeljes së supozuar, dhe PZAP-i, do të vendos për ankesën brenda shtatëdhjetë e dy (72) orëve nga koha e pranimit të saj, si dhe neni 13, paragrafi 3, nën paragrafi 3.2 i Rregullores Nr.01/2025 për Procedurat e Parashtrimit dhe Vendosjes së Ankesave të PZAP-it, në të cilin nen në mënyrë decisive thuhet se “PZAP-i e hedhë ankesën kur vlerëson se ajo nuk përmbush kërkesat e LZP-së dhe kësaj rregullore për shqyrtim, nën paragrafi 3.2. nuk është dorëzuar në afatin e paraparë ligjor”. Në rastin konkret nga provat e prezantuara nga ankuesi nuk është specifikuar data e publikimit të fotos në rrjetin social Facebook të kandidatit ndaj të cili është ushtruar ankesa, meqenëse nuk është dëshmuar nga ankuesi data e publikimit të fotos, Paneli, konform nenit 13 par. 7 të Rregullores Nr. 01/2025, për Procedurat e Parashtrimit dhe Vendosjes së Ankesave, me të cilin parashihet “Paneli para se të vendos lidhur me ankesën mund

të kryej hetim nëse e konsideron të nevojshme dhe të arsyeshme.” Andaj Paneli ndërmori hetim lidhur me pretendimet e paraqitësit të ankesës dhe gjeti se e njëjta është e pasafatshme, pasi që nga hulumtimi dhe verifikimi në rrjetin social Facebook shihet se kandidati Naim Gashi nga Iniciativës Qytetare “NE MUNDEMI”, ka bërë publikimin me datë 13 Shtator 2025 në ora 11:28 minuta, e jo me datë 14.09.2025 ashtu siç ka pretenduar ankuesi me ankesë, me çka vërtetohet se ankesa e ankuesit është paraqitur pas afatit ligjor prej 48 orësh.

Me dispozitën e nenit 9 paragrafi 5 i Rregullores Nr.01/2025 për Procedurat e Parashtrimit dhe Vendosjes së Ankesave, parashihet që: “ *Personi mund të paraqes ankesë në PZAP, brenda dyzet e tetë (48) orëve për shkeljet e pretenduara*, ndërsa nën paragrafi 5.5 parasheh që: “*për shkeljet e pretenduara të Kodit të Mirësjelljes për Subjektet Politike, Mbështetësit e tyre dhe Kandidatët*”. Pra, nga shqyrtimi i shkresave të lëndës, konstatohet se, ankesa është parashtruar, pas afatit ligjor për paraqitjen e ankesave, sipas nenit 39, paragrafi 3 i LZP-së, ku afati për dorëzimin e ankesave është 48 orë nga ndodhja e shkeljes së supozuar, ngjarja ka ndodhur me datë 13.09.2025, ndërsa ankesa është dorëzuar në postë më datë 16.09.2025, që do të thotë se njëjta është paraqitur pas afatit ligjor.

Paneli gjeti se ankesa është parashtruar pas afatit ligjor, dhe duke u bazuar në nenin 118 paragraf 1 të LZP-së, dhe nenin 13 paragrafi 3 pika 3.2 të Rregullës 01/2025, për Procedurat e Parashtrimit dhe Vendosjes së Ankesave, Paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.Anr.46/2025 datë 20.09.2025



Këshilla Juridike: Kundër këtij vendimi është e lejuar ankesa sipas nenit 118 par. 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi